




From wanem yumi stap enkarajem ol peren mo komyuniti blong rid long ol pikinini long ol eli ej blong 0-5 yia?

Oli faenemaot se taem yumi stap ridim ol stori buk long ol pikinini hemi wan impoten aktiviti blong helpem developem ol skil we bai pikinini i nidim blong save rid gud long fiuja taem. Taem yumi stap rid long ol pikinini blong 0 kasem 5 yia, i save sapotem pikinini blong developem lanwis, impruvum literasi mo riding skil blong hem. Mo tu taem yumi stap rid long pikinini i stap mekem hemi laekem mo wantem ridim buk mo hemi stap developem save blong hem.

Bren developmen tu i soem se taem yumi toktok wetem pikinini hemi lanem plante niu wod mo toktok. Lanwis mo literasi skil blong ol yang pikinini ia i develop hariap long ol fes 5 yia long laef blong wan pikinini.

'Stret taem' blong bren blong ol
smol pikinini i develop



"Council for Early Child Development" i bin developem graf ia (ref:
Nash, 1997; Early Years Study, 1999, Shonkoff, 2000)

IMPOTEN MESEJ

Yumi mas spendem kwaliti taem wetem ol
pikinini blong enkarajem lening blong olgeta
from hem i ki long developmen blong olgeta.

Naoia ol bon blong hem i stap develop, bodi blong
hem i stap mekem blad, ol 5 sens blong hem i stap
develop. Bai yumi no save talem long hem se "tumoro"
from tudei hem i mekem diferens long laef blong hem.

**Blong kasem moa infomesen,
kontaktem Eli Jaelhud seksen
long Ministri blong Edukesen
mo Trening long fon namba
22309 o 33500**



Yumi Rid Tugeta

Hao yu save helpem pikinini blong laekem rid?

- Mekem i kam wan fasin blong stap rid wetem pikinini blong yu evri dei long sem taem
- Letem hemi jusum buk we hemi wantem yutufala i ridim
- Tokbaot fored blong buk – wanem pikja i stap, stori i abaot wanem, hamas samting i stap long pikja...
- Tokbaot ol pikja blong buk
- Soem hem hao blong holem buk mo lukaot gud ol buk
- Askem ol kwestin taem yu stap rid blong jekem se hemi folem stori
- Ridim buk we pikinini hem i laekem



Risej i faenemaot se

- Taem famli i tekem taem blong rid long pikinini bai i kat koneksen mo developmen long lanwis mo literasi
- Taem pikinini i stap harem oli ridim aot ol stori, i helpem hem blong andastanem ol wod we oli raetem mo ridim
- Taem famli i tekem pat long komyuniti literasi prokram i save givhan bigwan long ol narafala memba blong famli tu

Rid i no stap nomo long buk

- Yu save rid taem yu stap wokbaot long rod. Ridim ol nem long ol saen long rod, nem long ol stoa, nem long ol trak
- Yu save rid insaed long stoa. Ridim ol nem blong ol samting long shelf, long katen, long bag...
- Yu save rid ol namba long kalenda
- Raetem nem mo putum olbaot long haos blong pikinini i save ridim olsem windo, do, tebol
- Hem i gud blong mekem riding hemi olsem wan pleplei. Yu save plei ol gem olsem:
 - Mi stap luk wan samting we i stat wetem leta B? (basket, bred...)
 - Raetem sem mak wod long 2 difren pepa mo putum ol pepa olbaot, givim wan pepa long pikinini blong hem i go lukaot hemia we i sem mak

Hem i impoten tumas blong rid wetem pikinini. Bae mi mekem wanem?

- Mi mas faenem taem blong rid wetem pikinini blong mi – traem mekem taem 10-15 minit evri dei
- Faenem wan skul o jios o laebri we yu save boroem ol stori buk long hem. Taem yu ridim finis, yu tekem i go bak
- Komyuniti i save mekem wan koleksen we i putum ol stori buk wan ples mo ol famli i save stap boroem buk
- Komyuniti i save mekem wan fanresing blong pem ol stori buk. No pem ol pleplei long stoa be pem ol stori buk
- Jusum ol buk we i kat fulap pikja long hem mo smol raeting nomo
- Yu save mekem stori buk blong yu wetem pepa mo sam kala pen

